

1064. v. 73.


Petricius Sebast.


de natura, causis sympto-
matis morbi Gallici.



4533

CIMELIA





SEBASTIANI PETRICII
DE NATURA, CAUSSIS,
SYMPTOMATIS MORBI GALLICI
eiusque curatione.

Quæstio.

*AN morbus Gallicus, corruptela totius substantiæ
iecoris, ex occurſu venereæ virulentie contracta, an-
tiquo ſeculo ignota, variis, miſerandisq; ſymptomatis
ægrum afficiens, methodo à veteribus Medicis præ-
ſcripta, ex natura morbi, ægri viribus, partibus affe-
ctis, indicationibus ſumptis, præſidiis partim ratione
partim experientia inuentis, ſola ratione, excluſa
prorſus experiëntia, adminiſtrandis, curādus ſit nec ne?*

APVD CELEBERRIMAM TOTIVS POLONIÆ
Academiã Cracouiẽ ad diſputandum
propoſita.

*Die Martij Menſis iiij. hora xij. & ſequentibus ad
placitum arguentium, Anno*

1591.

In Lectorio DD. Theologorum.



Clariss. viris D.

SYLVESTRO ROGUSKI,

Apud Sereniss. Reginam Poloniae, &c.

PAVLO NOVICAMPIANO,

Apud Leopolienses,

STANISLAO BARTHOLANO,

Apud Sendomirienses,

Philosophis & Medicis celeberrimis.

SEBASTIANVS PETRICIVS PILSNANVS,
Philosophiae & Medicinae Doctor, S. P. D.



ON gloriae, sed ingenii acuendi studio, viri clariss. publicam instituo disputationem: illud vanum, hoc homini literis consecrato, in omni vita necessarium puto. Necessitatem duplicem in me video: officii, quod commune est mihi cum omnibus literatis; legis, quae peculiaris est eius loci, in quo sum. Ea est Academiae Cracouienſis lex, vt ii, qui doctoratus insignia, in aliis Academiis accipiunt, per publicam disputationem, ad eius professionis facultatem, in qua Doctores creati sunt, admittantur. His ego legibus ab incun-

te ætate viuo; quibus non parere, religio est: obsequi, honestum. Itaque cum superiore anno, in clarissimo totius Italiæ Gymnasio Patauî, Professorum omnium concordi iudicio, Doctor Medicinæ renunciatus sim, in hac autem in numerum Professorum philosophiæ cooptatus, stipendia toto septennio confecerim; conuenientiùs esse duxi, nomen & dignitatem eius, quæ amplior est, professionis per disputationem hîc quoq. retinere, & illius apud hanc authoritatem tueri, cuius iudicio stetit, vt à philosophiæ ad medicinæ doctoratum prouherer. Dum apud hanc dico, doctissimorum virorum, qui de rebus medullitus iudicant, publicum consensum: non imperitiæ multitudinis, quæ quosuis pallio doctoris indutos, Doctores opinatur, applausum intelligo: vnumquemq. autem professionis suæ rationem reddere, apud eos, qui de ea optimè iudicare possunt, decet. Hoc licet pleriq. qui se lege solutos putant, qua cauetur, ne aliquis in hac vrbe medicinam faciat, nisi qui ab Academia hac approbatus sit, non faciunt: quid mea? Mihi expeditior ad virtutem via semper visa est; non id, quod alii, sed quod iure debeam facere. Quare, si voluntatem meam consideretis, audax sanè inceptum: si legis præscriptum, officiosum: si eos, apud quos de ingenio periclitandum

dum, formidolosum est. Audacia, minuitur officio: legis præscriptum, obsequio: periculum cauetur, honesta contentione. Materia disputationis minus apta theatro fortassis videtur; scholæ tamen Medicorum accommodatissima. Dicere, quod ab aliis turpiter fit, vt subuenias non insultes, inhonestum non puto: turpitudinem verò in seipsum admittere; tum demùm turpitudine ipsissima est: viri tamen boni est, calamitatem aliis non exprobrare; sed studio, cōsilio, opera subuenire, in malum prolapso. Ac tractata quidem hæc materia est à viris clarissimis, inter quos, vt reliquos taceam, est Albertus Ocellus, vir doctissimus, qui patria lingua satis eruditè, copiosè, & diligenter, hanc prosequutus est; nondum tamen ob sui difficultatem ita consumata, vt posteris eius excolendæ ianua penitus clauderetur. Absit inuidia dicto. Non id mihi assumo, vt cultiorem fecisse videri velim: verùm aliis, qui nos & ingenio & iudicio longè superârunt, eius rei occasionem porrexisse. Nobis sufficiat, aliorum ingenio paratam segetem in horreum exercitationis conuehere; vt hac ad vtilitatem ægrorum, qui in nostra regione hoc morbo frequentes tentantur, expeditiùs vtamur. Hanc disputationis tabellam, vt vobis præcipuè dedicem, hæc me potissimè impulerunt causæ.

85
Primò, quòd in hac scientia, & industria, & obseruationibus, non ab aliis quæsitis, sed vestris medicationibus partis, plurimum polleatis: vt ad eā rem maxima adiumenta, vel in his reprehendendis, vel corrigendis, vel illustrandis præstare vos posse, nemo non intelligat. Deinde, quòd omni inuidia vacui, non solum vestri ordinis viris, sed etiam toti Academiæ, quam & florentissimam & ornatissimam apud Regem & Primores regni contenditis, fautores estis: neq. id solum ex prompta voluntate, qua quemque contentum esse oporteat; sed opera & fortunis quibus pauperiores professores subleuatis, & magnam adolescentum turbam in studiis literarum liberalissimè fouetis. Hoc vnum in votis habentes, vt patria nostra, saltem eam vnicam, quæ bonorum virorum congregatione primitus coaluit, Academiā ad erudiendos suos natos retineat: si vel hanc ad nitidiorē formam propositis præmiis, quæ ad virtutē excitarent, redigere negligit, vel plures æmulatione aliarum nationum instituire non potest. Turpè enim est nos Polonos, ingenio, iudicio, industria, non inferiores aliis, ad exteros culturæ causā cum maximo fortunarum dispendio, & turpi peregrinorum morum versura proficisci; cum & commodiorem domi in patriis moribus culturam habere, & exte-
ros ad

ros ad nostra quoq. admiranda excitare poterimus. Ego verò hoc de meis Polonis, quod poëta de agricolis, & quod Socolouius noster, vir grauiſſimo iudicio, in Quæſtore voluit, veriſſimè & aptiſſimè dicere poſſum, tum demum illos futuros felices, ſua fibona norint. Id quod Simon Simonides Leopoli-enſis grauiſſimè cecinit his verbis:

*Nunquam tamen magis meam
Mentem laudum externarum adminatio ducet
Quàm indigenarum: Iſtam
Vanam & nefandam peſtem enim ſcio
Turbâſſe vitam, & plurima iam diu
Splendida regna, ſolo
Reſque publicas, ſacras
Vertiſſe; in ſua ciues
Dum ſunt iniqui, atque externi
Sectantur inſolenter.*

Sed non longè abiêro, tu Bartholane præſtantiſſime, filium maiorē natu Latinis, Græcis, Hebraicis literis domi pulchrè erudiri feciſti, vt abundè declarares fruſtrà ad externos, earum rerum cauſſa, quę domi ſine magna cura haberi poſſunt, mitti. Pergite igitur, viri clariſſimi, in ſtudio eius partis Reipub. in qua omnium ordinum fundamentum incolumitatis conſiſtit, promouendæ, vt cœpiſtis, currere, vt veſtra cura, & numeroſiores in hoc regno Medici ſint,
qui

qui certè rari sunt, & vestris incitamentis Patria pul-
uere neglectarum artium, quo iam pridem aspersa
in squallore iacet, iam tandē excusso, nitidior splen-
didiorq. exteris nationibus appareat. Quare quod
omnibus in vniuersum, de his quę hīc asseruntur iu-
dicandi munus, publicè proponitur, hoc vobis pri-
uato quodam iure dicatur & consecratur: vt quę
videbuntur falsa, refellere; quę vera, approbare;
quę obscura, illustrare; quę ambigua, fulcire ac
stabilire, summa qua in hac arte polletis industria
velitis. Mihi à vobis reprehensio non molesta: ap-
probatio laborum incitamentum: illustratio grata
futura est. Valere, Cracouiæ, die Feb: 14.

Anno 1591.

DE NA-

De natura morbi Gallici.

CONCLUSIO I.

Morbus Gallicus est corruptela totius substantiæ iecoris, & humorum in eo contentorum.

COROLLARIA.

1. Morbi, qui corpus nostrum affligunt, alij agunt manifesta qualitate, vt caliditate, humiditate, siccitate, & frigiditate: alij verò toto temperamento, quæ totius substantiæ est actio, vt venena, & quæ toto temperamento inficiunt.

2. Actio manifesta hæc, ab intemperie prouenit, cuius caussa est mistio, quæ relinquit excessum alicuius qualitatis ex mutua actione & passione elementorum prouenientem. Totius verò substantiæ actio per generationem consequitur formam substantialem.

3. Mistio verò à generatione differt. 1. Quòd illa fit per primas qualitatum operationes, nempe calidum, frigidum, siccum, & humidum, inuicem inter se agentes & patientes. Generatio verò non fit per primas qualitatum operationes, sed per secundas, scilicet per congregare, coniungere, immutare, &c.

2. Quia mistio fit omnium qualitatum vnio: generatio duarum tantum, scilicet humidi & sicci: sic enim definitur à Philosopho 4. Metheororum cap. 1. Generatio est mutatio humidi & sicci ab actiuis facultatibus facta. 3. Quia mistio generationem antecedit, hæc consequitur.

4. Ut igitur mistio secundum naturam temperiem efficit vel intemperiem, non morbosam agentem manifestò, videlicet calido, vel frigido, vel humido, vel secco: sic recessus à temperamēto efficit intemperiem morbosam & præternaturalem viciantem actiones, vel ratione calidi, vel ratione frigidi, vel humidi, vel sicci, vel horum coniugatione. Et ut generatio cuique rei vel membro propriam actionem indit, veluti ventriculo chylicationem, epatis sanguificationem, cerebro sensitiuarum facultatum vim &c. sic recessus à statu generationis efficit depravatam proprietatem rei, ut sanguificationem vel ablatam, vel diminutam, vel corruptam.

5. Nam in generatione mistorum tria sunt consideranda.

1. Unio omnium elementorum alteratorum, quæ efficit crasim, vel complexionem. 2. Proprietas in passivis qualitatibus tantum, quæ est congrua terminatio humidi cum secco, ex prædominio calidi terminantis, ad quam sequitur peculiaris actio rei genitæ: cuius causa præcise cognosci non potest, quia gradus complexionis non nisi naturæ soli cogniti sunt: ut magneti attractio ferri, veluti propria actio post generationem relictæ est, cuius causa cognosci non potest: sic chylicatio ventriculo, sanguificatio epati &c. 3. Consideratureductio formæ substantialis, quam necessario consequuntur, & complexio primarum qualitatuum per primas operationes, & proprietas passivarum tantum qualitatuum per secundas operationes.

6. Tria ergo erunt in re vivente, forma substantialis, proprietas, & temperamentum.

7. Hoc autem differt inter proprietatem rei, & temperamen-
tum: quòd temperamentum manifestò agat, secundum vim
quali-

qualitatis sibi indit. & indifferenter: *Proprietas agit in hoc vel illud determinate: ut Rhubarbarum, quia calidum, attrahit humorem; at quod attrahat bilem flauam tantum, id proprium ei est à natura tributum: sic ventriculus, secundum qualitatem temperamentum coquit cibos; at quod chylificat, hoc ei à natura est tributum proprium. Quamquam non omne calidum purgans asserendum est; sed quod habet inditam sibi à natura talem facultatem. Etenim piper calidum est, non tamen ducit humores, verum concoquendi vim habet.*

8. Quod idem est, ac si dicas temperamentum agere manifesta qualitate: proprietatem autem rei, quæ à tota substantia profiscitur, & totius substantiæ nomine appellatur, occulta virtute, quæ nullius interuentu consequitur formam substantialem: cum temperamentum sit tanquam secundarium instrumentum. Ideò Galenus 3. meth. asserit medicamentorum attractiones perfici proprietatibus, quæ in substantiis sunt rerum.

9. Morbus itaq; Gallicus, non agit manifesta qualitate; sed à proprietate: quia proprietas iecoris, quæ consistit in sanguificatione corrumpitur; ita ut bonos succos, quibus membra nutriantur, generare nequeat.

10. Itaq; fundamentum huius morbi, constituimus epar ipsum sanguificationis officinam, tanquam proprium subiectum. Nam licet in pene vel in faucibus initia mali huius apparuerint; tamen antequam epar inficiant, rectè adhibitis medicamentis facile tolli possunt: nec insignem in ægro faciunt actionum deprivationem; ut ob hoc non mereantur dici morbus Gallicus.

11. Quare in epate, cum tria sint: forma substantialis, tem-

penimentum & proprietas : in affectis morbo Gallico, non læditur principale agens, scilicet forma substantialis; quod hæc nec intensiorem nec remissionem admittat. Non læditur quoque temperamentum: quia manifesta qualitate agentibus medicamentis mederemur huic morbo: utpotè si esset calidus refrigerantibus, si frigidus calidis, si siccus humidis, si humidus siccis expugnaretur: quod non fit.

12. Relinquitur ergo ut dicamus proprietatem iecoris lædi, qua quidem læsa necesse est ad corruptionem tendere sanguificationem, occulto modo.

13. Pleriq; morbum Gallicum affirmarunt esse iecoris intemperiem calidam & siccam, eo delusi, quòd exustiones quædam in ægris appareant. Sed falluntur: quia omnes intemperiem calidam & siccam iecoris habentes, haberent morbum Gallicum: tum quia hydropicæ detenti, morbum Gallicum haberent hydropis remedium. Hoc autem sensus ipse redarguit: nam accidit, & hydropicum detineri morbo Gallico, & calida intemperie iecoris affectum illo carere.

14. Porro, licet exustæ materiæ symptomata in morbo gallico passim appareant, præsertim cum radices fixerit malum, ut siccæ pustulæ, gutturi & columellæ erosio, & id genus alia; tamen hæc ex calida intemperie non oriuntur primitus, sed ex viciato toto iecoris temperamento, proprietate, scilicet illa, quæ rursus trahit secum humoris alicuius vicium, qui ex natum sua qualis fuerit, talia producet symptomata viciatus.

15. Dum igitur in definitione morbi Gallici dicimus esse corruptelam, intelligimus corruptionem fientem non factam, quod generis loco volumus intelligi vitantes tautologiam, si dicere-

diceremus morbus Gallicus est morbus: cætera locum differentie obtinent.

16. Quando verò dicimus corruptelam esse totius substantiæ, proprietatem intelligimus rei, seiungentes hunc morbum, ab illis, qui sunt manifestæ qualitatis: ut sunt, cachexia, hydrops, ictericia, inflammatio, obstructio, qui epatis sunt morbi, sed manifestæ actionis.

17. Dum verò dicimus iecur & humores in eo contentos corrumpi, distinguimus morbū Gallicum ab aliis morbis totius substantiæ, qui non in iecur, sed in alias partes agunt, ut sunt pestis, scabies, ophtalmia.

18. Cum autem vnumquemq; morbum, aut in intemperie, aut in mala compositione, aut in continui solutione (tot enim sunt morborum genera) oporteat collocari, morbum Gallicum ad intemperiem nō manifestam, sed occultam referimus. Quod videtur sentire Hyp: in lib. de natura humana, qui cum enumerasset quatuor humores, inquit: Dolet autem, cum horum aliquod vel minus vel amplius euadat, vel in corpore secedat, atq; non in omnibus sit attemperatum. Ubi particula vltima: non in omnibus attemperatum: indicat non exactam temperaturam per ipsorum tota, ex parte materiæ, quæ est humidum & siccum. Etenim in affectu corporis inculpato ex omni parte, non solum est moderantia quatuor elementorum, sed etiam exacta temperatura per totam materiam, ut Gal. in Com. eiusdē lib. vult: Verbi gratia, lapidis generatio est ex humido & sicco. Ubi in hoc constituendo humidum non permeat omnes partes sicci ad amussim, non in omnibus quoque partibus constanter coheret siccum; sed in aliis ad amussim, in aliis mini-

me. Ubi ad amussim, lapidis constitutio est integra; Ubi non item, lapidis illud temperamentum viciatum esse necesse est: & sic facile ad corruptionem propendere, non quia vel nimis siccus, vel nimis humidus sit; sed quia non bene partibus suis per totas attemperatus partes. Sic de iecoris constitutione, & huius constitutionis corruptione intellige.

DE CAVSSIS MORBI GALLICI.

Conclusio II.

Occursus venereæ virulentia morbum Gallicum producit.

COROLLARIA.

1. In congressu venereo incaltescentibus corporibus, in pudendo mulieris aliqua portio infecti humoris relinquitur: quæ quandoque generans vlcus, quandoque sine vlcere proximos humores inficit: & hic continua serie vicinos: donec ad iecur perueniat praua qualitas, quæ superfluitantem in eo & toto corpore, humorem sensim ac sensim corrumpit.

2. Constat hunc morbum apud nos contactu, osculis, poculis, pectinibus, vestibis, linteis, infantis lactatione contrahi; tamen hæc ab inordinata impuræ libidinis volutatione originem habent.

3. Indos, à quibus hic morbus profectus est, extra veneris usum populariter infestat: non aliter quàm nos Variolæ. Ideò Hispani facete hunc morbum sua lingua, Magnam Variolam, vocant.

4. Non

4. Non est autem necesse, ut quemadmodum illos, nos quoque populariter inficiat. Nam illis ab astris defluxit hic morbus: nostris autem partibus per contactum communicatur.

5. In Numidia, & nigra Æthiopia, hic morbus nullus viget: & qui infecti se conferunt ad has regiones, solius cœli beneficio, sine ullis medicamentis sanantur.

6. Astrologi ingeniosissimi cœlestium domorum fabricatores, ut omnia solent, hunc morbum ex constellationibus syderum productum esse aiunt, scilicet in oppositione Saturni & Iouis, inter meridiem & occidentem in dominio Martis, Anno 1493.

7. Verius theologi efficientem causam huius morbi Deum esse volunt: quo homines luxuriose viuentes, & volutabro impuræ libidinis inquinatos seuissimè exercet: ut meritò flagellum scortatorum dicatur.

8. Quare morbi Gallici, causam proximam & efficientem dicimus esse virulentiam & contagionem: primum occultis meatibus epar inficientem: deinde humorem in corpore superfluantem.

9. Si sanguis superfluitat in massa, infectus efficit pustulas rubras: si bilis superabundans in corpore inficiatur, parit dolores capitis, erosionem columellæ, oris putredinem: si verò melancholia abundans inquinetur, producit pustulas nigras, carbunculos, osium vehementes dolores, ad extremum cariam.

10. In quam autem materia infecta decumbet partem, infra ob grauitatem, supra ob leuitatem, vel membri alicuius debilitatem; in ea maximè seuit pustulis, tumoribus, doloribus, & ulceribus, secundum humoris naturam distinctis.

11. Contingit autem in hoc morbo temporis longiori progressu,

gressu, crassos generari humores, & in corpore abundare: si
 iecur sit frigidum, pituitam; si calidum, melancholiam, quæ
 cum non possit gubernari, neque à natura mutari ob prauam
 qualitatem; detinetur & aduritur magis ac magis, ita ut non
 solum exulceret partes, in quas delapsa fuerit; sed etiam non
 parcat ossibus natura sua duris.

12. Hæc autem contagio per participationem spirituum
 naturalium, fuliginis, caloris, sudoris, saniei, salivæ, icho-
 rum communicatur.

13. Causse adiuuantes sunt, habilitas corporis ad patien-
 dum, spirituum imbecillitas præsertim naturalium, amplitudo
 vasorum, ductuum & viarum, mollitudo partium, cutis rari-
 tas, excrementorum abundantia, cacochimia, plethora.

14. Quibus causis fit, ut plerique citius, alij tardius, alij ma-
 gis, alij minus contrahant hoc malum; alij vno solo coitu inqui-
 nentur, alij vix innumeris.

15. In mulieribus hoc malum latentius est, quàm in viris:
 quia subinde menstruis purgantur.

16. Sed mirari subit, unde hoc malum in pudendum mulie-
 bre se immiserit, cum antea non extitisset? Peripatetici re-
 spondent, accidentia suis in causis tecta diu latere, suscipereque
 sensim incrementa, adeo ut sensus fallant: velut lapidis exca-
 uatio quæ à gutta fit: & ædium ruina non sine apparituum
 antegressione subit: sic virulentia illa in pudendo orta ex sen-
 sim antegressis causis, repente apparuit.

17. Antegressæ causæ menstrua & putredo sunt. Nam li-
 cèt menstruus sanguinis sit secundum naturam: nihilominus
 tamen aliquo pacto deprauatus potest dici præter naturam. Ga-
 lenus

lenus autem 6. de loc. aff. 5. manifestè dicit, semen & menstruas purgationes retentas, venenum euadere. Præterea experientia constat, menstruat as mulieres specula inficere, segetes, herbas, vt Columella testatur. Quinimò cum mulieribus tempore menstruorum coeuntes, lethales ac difficiles cumtu acquirunt morbos; ideò in veteri testamento lege cautum est, ne viri cum mulieribus tum conuersentur.

18. Et quemadmodum hoc virus producit ingentem in corpore putredinem humorum: ita putredo potest ad tantam violentiam peruenire, vt non solùm corpus, in quo est, pessime afficiat; sed etiam aliud corpus integrum inficiat: quod videmus fieri in phthisicis, in quibus nascitur tanta putredinis malignitas, vt adstâtes halitu et odore prauo, quasi aliquo veneno afficiat.

19. Est autem putredo mutatio totius substantiæ, putrescentis ad corruptionem ab extraneo calore. Gal. II. meth. med. 8.

20. Hæc putredinis definitio ab Arist: definitione, quæ est: Putredo est corruptio proprii & naturalis caloris in unoquoque humido ab extraneo calore: non differt nisi verbis. Cum enim Arist: dicit, Putredo est corruptio, id clariùs effert Galenus: Putredo est mutatio ad corruptionem. cum autem dicit totius substantiæ putrescentis, intelligit illud temperamentum, & corpus quod constat ex nativo calore & humido.

DE MORBI GALLICI NOVITATE.

Conclusio III.

Morbus Gallicus veteribus Medicis, Hypocrati, Galeno, Auicena, & aliis ignotus fuit.

COROLLARIA.

1. Morbi alij sunt antiqui, alij recentes. Antiqui sunt, qui à veteribus artis medicæ scriptoribus sunt cogniti, ut sunt, calculus renum, artritidis &c. Recentes & noui sunt à veteribus ignoti, quorum causæ ab iisdem non sunt discussæ, nec curatio præscripta; ut sunt maculæ in febribus malignis, Peticulæ vocatæ, in quorum genere est quoque morbus Gallicus.

2. Morbi habent suas periodos & tempora, quibus exoriantur & intereunt. Lepri de qua in sacris legimus libris, hoc nostro tempore non est, quæ olim fuit: sic Gallicus morbus illo tempore non fuit, qui nunc est.

3. Morbi habent vices suas, habent personarum, atq; etiam membrorum, regionum, ciuitatum delectum. Sunt qui non attingunt pueros, sunt qui parcunt sexui fœmineo, sunt qui potentes impetunt, plebi verò parcunt.

4. Sudor lethiferus in Anglia ante annos sexaginta, cum antea non fuisset, cœpit. In Carinthia, tumores gutturiij. In Russia nostra dolores quidam neruosarum in toto corpore partium, ab humore lento & viscido, qui impetum faciens in caput extra caluam in complicatos crines, sensim vsque ad terram prominentes, excrefcit, cum dolorum solutione: hic nostra lingua vocatur G-wozdziec, quasi dicas, clauus, eò quòd ad similitudinem clauicrines prominent. Venetiis frequens est claudicatio. Crosnæ, lippitudo oculorum. Præmissiæ, alui fluxus vigent.

5. Hypocrates 3. Epyd. sect. 3. sente. 4. morbos recenset, quos in morbo Gallico similes experimur, vlcera sordida, capitis & men-

Et menti glabriciem sine febre, exulcerationem pudendorum
Et faucium, ossa etiam erosa Et nudata.

6. Sed hæc ulcera Et reliqui affectus, nō sunt morbi Gallici propago, nec similia his, quæ fiunt in morbo Gallico. 1. Quia illa antiquorum ulcera, non inficiebant cæteros, hæc inficiunt. 2. Quia dolores horum affectuum noctu non exacerbabantur; nostri noctu maximè sæuiunt. 3. Quia veterum pustulæ purgato corpore cessabant; nostræ purgationibus non cedunt, nisi habitus totius corporis Alexipharmacis euacuetur. 4. Quia dolores antiquorum cessabant anodynis; at in hoc morbo anodynis exacerbantur.

7. Pleriq; morbum Gallicum dicunt esse cum Elephantiasis eundem, ut probent hunc morbum, veterum etiam temporibus fuisse: sed si definitionem Elephantiasis Galeni inspiciant, facile refutantur. Elephas, inquit, est, qui cutem crassam Et inæqualem reddit, tum colorem liuidum in albo oculorum facit, exeduntur pedes manuumq; summæ partes, sanies destluit liuida et male olens. Quod quidem morbo Gallico laborantibus non euenit.

8. Auicena scribit de quodam genere morbi, quod Sabassatum vocat, quod Lichen Græcorum est, inficiens vniuersum corpus, vel tantum caput, quod volunt esse Gallicum morbum pleriq;. Sed cum Gallicus morbus, non solum caput, sed etiam cæteras partes infestet, non videtur probabile, Sabassatum, morbum Gallicum esse apud Auicenam.

9. Ad extremum historiæ testantur, morbum Gallicum non fuisse cognitum veteribus, qui anno 1493. ex India in Europæ oras disseminatus est.

DE SYMPTOMATIS MORBI GALLICI.

Conclusio III.

Morbus Gallicus scortatorū tyrannus, his satellitib⁹ cognoscitur, pustulis, exulceratione oris, palatī, columellę, gonorrhea, bubonibus, tumoribus præter naturā, doloribus vehementibus in partibus neruosis, in tibiis pedum, manuum, maximē noctu exacerbantibus, fonitu auriū, defluuio pilorū, &c.

COROLLARIA.

1. *Qualis autem humor in corpore dominus fuerit, talem adsciscit sibi seruum. v. g. rubor sanguinis, rubris pustulas, vel bubones ipsos: bilis flaua, producit pustulas flauas, maximē in superioribus partibus ob sui leuitatem: melancholia nigra in profundioribus partibus, vt in ossibus cariem.*

2. *Dolores vehementissimi fiunt à vapore quodam noxio et maligno, qui propellitur ab epate, vel ab excremento coaceruato, per malam nutritionem in particula aliqua, & præcipuē circa periostia cuiuslibet partis, dum ossa, quæ per transsumptionem nutriantur, attrahunt vi alimentum sibi ineptissimum.*

3. *Tumores & gummata fiunt, aut quia particula non bene nutritur, aut quia coaceruat materiam excrementitiā, aut quia epar transmittit excrementum.*

4. *Exulceratio pudendi, ex confricatione mutua qualitate praua communicata.*

5. *Ex-*

5. Exulceratio oris, palati, columellæ, fit à materia leui ad has partes ascendente, & illas corrodente acrimonia.

6. Defluuium pilorum, ob excrementi in crines mutandi putredinem, qua viscositas amittitur.

7. Bubones autem, quòd fiant nihil mirum est: siquidem etiam extra morbum Gallicum emunctoria ad inguina posita suscipiunt sanguinem vel redundantem vel corruptum.

8. Interdum autem bubones sunt sine dolore, interdum cum dolore: quando materia est pituitosa, frigida, crassa, viscida, sine dolore fiunt; quando autem acris, mordax, callida est, efficit dolores.

9. Gonorrhœa fit, ob apertionem & raritatem vasorum seminariarum factam à materia acri, corrodente & virulenta.

10. Adnascitur in meatu urinario caruncula quædam vel verruca, impediens transitum urinx, quæ eo modo fit, quo caro superfluitans in vulneribus, cuius partes superficiales irrigatione urinx adstringuntur. Et hic est tortor miserorum ægrorum acerrimus, quem submouere intus latentē difficile est.

11. Solet quoque huic morbo febris quandoque famulari, vel ob putredinem humorum, vel ob feruorem viscerum, maxime noctu efferuescentium.

12. Neque verò omnibus his in afficiendis ægris utitur ministris, sed leuioribus primū, ubi incipit possessionem suam dilatare: postquam verò ditionem suam per totum corpus extenderit, atrocissimis utitur tormentorum famulis, ita ut facile dignoscas domini luxuriantis potentiam.

13. Incipiens potentia est, ubi in pudendo vlcera apparent: quod de his intelligi velim, qui coitu hunc tyrannum accersunt

Ubi mutatio caloris in facie est, corporis totius ignauia, sollicitudo, somnolentia interrupta, quæ partim ob viciatum alimentum, partim ob vapores turbulentos, qui cerebrum exagitant, fiunt. Augescens potentia est huius tyranni, cum inflammantur inguina, in iecore massa sanguinis inficitur. Ad summum autem redacta censetur, cum adsunt ingentissimi dolores, vlcera, tabe manantia, iecoris substantiæ corruptio, tumores seu gummata, pilorum defluuium.

14. Hi autem milites sine comœatu viuere non possunt, humores sunt quos depascunt. In principio humor fluit ad vlcus: in augmento ad bubonem, quo tempore humores in iecinore infectos existimandum est: in statu omnia mala, quæ in cute apparent, ex humoribus etiam infectis, proficiscuntur.

15. Ita autem hi milites suo domino fidi sunt, ut aliqua medicamentorum vi eiectum dominum, nisi eradicetur, latitantes expectent, ei iterum famulaturi reuersuro; ut si quid erratum fuerit in regulis custodiendæ sanitatis manifestò,

Inuadunt corpus luxu vinoq; sepultum,

Uig; ruunt iterum, portisq; patentibus omnes

Accipiunt socios, atq; agmina conscia iungunt.

16. Peius autem exercent corpus secundo reuersi, quàm primò ingressi, tum ob corporis prostratas vires in superiori pugna, tum ob humorum, quibus aluntur, profundam sedem.

17. Dolorum in iuncturis fixorum, caussa est imbecillitas articularum qui suscipiunt, nec susceptum humorem propellere possunt crassum & rebellem.

18. Nocturnorum dolorum, caussa est nox frigidior & humidior, qua humores incrassantur, & incrassati minus à calore

natiuo

natio reguntur: tum quia noctu calor ad interiora reuocatur, tum quia àëris frigiditas densat poros corporis, ut excrementa acriter penetrare non possint.

19. *Hæc & alia multa morbi Gallici signa nõ indicant demonstratiuè infectionem luis venereæ, siquidem pleriq; horum etiam ex manifestis caussis accidunt, nisi æger se cum infecta muliere rem habuisse, vel consuetudinem cum infectis, vel se ex patre huiusmodi morbo laborante, natum esse fateatur.*

20. *Hæc tamen in morbo Gallico, à morbis aliis discernimus duobus modis. Primò, quando contumacia sunt symptomata, ut non facile remediis cedant. Secundò, quando medicamenta manifesta virtute agentia non expugnant hunc morbum.*

21. *Et ut non est necessarium, ut in laborante morbo Gallico omnia hæc signa inueniantur; sic non facile inuenitur tali morbo infectus, unico symptomate comitatus: quia cum fomes morbi Gallici situs sit in epate, à quo omnia membra alimentum attrahunt; vix fieri potest, ut ab infecto, humorem infectum non bauriant.*

DE VETERVM METHODO medendi.

Conclusio V.

Morbus Gallicus, quamuis veteribus ignotus fuit, curandus tamen est methodo à veteribus præscripta.

COROL-

C O R O L L A R I A.

1. *Omnis medendi methodus per indicationem fit.*
- 2.. *Methodus autem curandi, est ars indicatione inueniens iuuantia, gratia recuperandæ sanitatis hominis.*
3. *Indicatio verò, est per rationem insinuatio agendorum. Ratio hæc syllogismo vel entimemate constat: ut febris est morbus calidus; ergo indicatio oritur refrigerandi. Indicatio ergo est iuuantis seu utilis inuentio. Ad Tr. 6.*
4. *Fundamentum indicationis, est morbi cognitio, qualis scilicet is naturâ sit.*
5. *Indicatio duplex est ab evidentibus, et à natura rei. Methodici illa vtuntur; hæc dogmatici.*
6. *Cognitio naturæ morbi est meta, ad curandos morbos: ratio autem curandi consistit in inueniendis his, quibus morbi possunt curari, ubi adest spes curandi.*
7. *Quicquid ab experientia sciunctum est, id totum indicatio appellatur.*
8. *Quamuis autem omnes medicinæ partes medendi gratia sunt, tamen per solam curandi partem inuenitur indicatum, id est iuuans præsidium contra morbum definitum, & præsidij vsus, quantum, quomodo, quando, & ubi administrandû sit.*
9. *Physiologica à curatrice distinguitur, quòd in hac non proponitur iuuans, sed potiùs indicans, quod est virtus: siquidem in parte Physiologica agitur de rebus secundum naturam, quæ in vnicam virtutem referuntur.*
10. *Pathologica distinguitur à curatrice, quòd in Pathologica non proponitur iuuans, sed potiùs indicans, quòd est præter*

præter naturam, ut morbus, causa, & Symptomata.

11. Symiotica differt à curatrice: quia in Symiotica non inuenitur iuuans, sed potius indicans per signa, quod dicitur signatum; ut temperaturi ægri calida, indicat frigida. Hæc autem propius famulatur metodo curatrici: siquidem temperaturam calida, ut unum, accedente febre non intensa indicat præsidium, ut duo: ut scilicet temperaturam coindicet, febris propriè indicet. Idè Gal. quandoque confundit curatricem cum Symiotica parte.

12. Pars medicinæ in tuenda sanitate consistens, differt à curatrice: quia licet utraque iuuans quærit, tamen illa iuuans quærit causâ conseruandæ, hæc causâ recuperandæ sanitatis.

13. Quamuis omnes hæ medicinæ partes ad morbi naturam cognoscendam & tollendam pertinent; tamen his curatrix pars tanquam præcognitis organis ad inueniendâ præsidia accommodata, quibus morbi propulsarentur, suo modo utitur: sine quarû cognitione, nullus potest metodo & arte morbos curare.

14. Ut ergo in cæteris morbis, ita & in morbo Gallico, curatio, contrariorum lege perficitur, metodo inuenta & administranda. Nam ut manifesta intemperies, intemperie contraria tollitur: sic morbus totius substantiæ, medicamentis, totius substantiæ proprietate contrariis, aufertur.

15. Vnicuique enim morbo occulto, opponitur aliquid secreta qualitate efficax: licet extra methodum inuentum, tamen methodo administrandum.

16. Digna animaduersione est eorum temeritas, qui eximum aliquod remedium nacti, sine iudicio, sine ratione, sine arte, utcunque fors tulerit, statim ad curationem proferunt.

D

17. Idè

17. Ideò Hippocrates Artis initio dixit, *Experientiam esse fallacem*: eam nimirum, quæ nec ratione, nec methodo, nec iudicio suffulta sit.

18. Quod verò Galenus dicit, *facultates, quæ totius substantiæ proprietate fiunt, à methodo & ratione alienas esse*; non idcirco dixit, quòd illis nulla methodo vti liceat; sed quòd, vt quæ sunt in calefaciendo, frigefaciendo, humectando, siccando, methodis non inuestigentur. Illas enim non ratione ab odore, vel sapore, sed sola experientia inuenire possis.

19. Aliud ergo est alicui morbo remedium inuenire aptum experientia: aliud inuento remedio vti, non experientia, sed iam ratione & methodo.

20. Nam licet occultæ facultates, manifesta demonstratione sciri non possunt; methodo tamen & ratione, ad curationem morborum adhibendæ sunt.

21. Hinc Gal. 3. meth. med. 7. Hunc esse, inquit, optimum cuiusque particularis ægritudinis Medicum, qui iam methodum quandam comparauit: ex qua & dignoscere naturas possit: & cuiusque propria remedia, quæ sint, coniectura assequi.

22. Morbus itaq; Gallicus, veterum methodo comprehendì debet: ea autem est; per indicationem eius auxilia inuenire.

DE INDICATIONIBVS IN morbo Gallico.

Conclusio VI.

Ex na-

Ex natura morbi, ægri viribus, partibus affectis, indicationes curandi in morbo Gallico depromuntur.

C O R O L L A R I A.

1. Quia omnis morbus sub methodum curandi cadit; Gallicum quoque morbum necesse est methodum curandi habere, quæ est per indicationes: quarum authores sunt, Hippocrates, & post hunc Galenus.

2. A natura morbi Gallici indicationes sumuntur: & est totius substantiæ iccoris corruptio, præsertim si morbus radices fixerit.

3. In huius ergo naturæ morbi, considerandum est aliquid factum, & aliquid fiens.

4. Factum, humores corrupti à contagiosa qualitate, qui indicant sui ablationem. Et quia humores hi continent ex prædominio manifestam intemperiem: medicamentis quoque manifestè agentibus auferri debent.

5. Fiens est in morbo Gallico fomes ille contagionis, qui sensim ac sensim agit in probos succos eos corrumpens, qui indicat quoque sui ablationem. Et quia hoc quod fit, est in eorum morborum genere, qui in totius substantiæ proprietate consistunt; etiâ medicamentis à proprietate contrariis auferri debet.

6. Iam verò morbus Gallicus, aut est recens, aut diuturnitate temporis confirmatus. In recenti morbo Gallico, tantum est fiens, quod potest auferri humoris redundantis, quem virulentia occupavit euacuatione, medicamento, manifesta qualitate operante.

7. A viribus ægri indicatio sumitur, earum conseruandi quod præstatur alimentis & medicamentis.

8. Alimentis, quatenus nutriunt corporis membra solida. Medicamentis, quatenus remouent impedimenta nutritionis. Hoc autem fit propterea, quòd ad vires ægri, tota superandi morbi spes negotiumq; deuoluitur. Natura enim ipsa morbum sanat: Medicus autem est minister naturæ.

9. Ut autem vires indicant nutritionem vt conseruentur; ita morbus indicat abstinentiam: quia nutritio laborem naturæ facit pugnanti cum morbo, dum coquantur alimenta.

10. Quare in morbis semper est de alimentis detrahendum: non æque tamen semper, sed quandoque multum, quandoque parum, quandoque etiam in totum subtrahitur: pro morbi scilicet maiori vel minori violentia, ac pro virium constantia vel imbecillitate.

11. Vbi morbus maximè urget, à multis alimentis prohibendi sunt ægri, qualescunq; vires fuerint. Nam si hæc valide sunt, instauratione per cibos non indigent; sin imbecilles, præterquam quòd alimenti copiam non ferrent, etiam in pugna aduersus morbum à concoctione auertentur.

12. Gallicus verò morbus, cum chronicus sit, pleniori victu vtendum indicat; ita tamen vt non sit victus sanorum, sed ægrorum, de quo pro temporum morbi diuersitate subtrahendum erit; non tamen ita, vt in acutis subtrahere Hippoc: præcipit.

13. A partibus quoque in corpore malè affectis, sumuntur indicationes. Nam morbus Gallicus, si malè dispositam prehenderit partem aliquam, tanto magis vt debilem cruciabit: vt ventriculi imbecillis, prauis humoribus referti, virtutem, tantò ma-

to magis prosterneat, quanto ipse deterior fuerit; sic de epate, de cerebro, de corde, atque aliis partibus in corpore maximi momenti intellige.

14. Atque tam horum cura suscipienda est diligens, ut intemperatæ per contraria temperentur, prauis humoribus refertæ mudentur, imbecilles roborentur.

15. Nec sufficit agendorum habere indicationes, sed oportet diligentius contemplari, an possibile & facile sit adimplere propositas indicationes: siquidem Medici officium est, non solum ab ægris morbos tollere, & impetus morborum sedare; sed etiam eorum curationem non aggredi, qui à morbis victi sunt.

16. Quare pessimè illi faciunt, qui vix dum conspecto ægro sanitatem temerè promittunt, non considerantes magnitudinem morbi, & ægri vires à morbo labefactatas: sic enim & ægrum vana spe ludunt: & medicamenta, quæ multis profuere, pessundant.

17. In explendis igitur agendorum indicationibus tria cum Galeno 4. meth: 6. consideremus, magnitudinē morbi, affectarum partium præstantiam, & malignam morbi naturam.

18. Magnitudinem morbi Gallici coniiciemus, si fuerit morbus inueteratus, si ægri vires labefecerit, si aliqua symptomata graui adiuncta habuerit; ut epatis fluxum diuturnum, febrim, cordis tremorem, &c.

19. Partium affectarum præstantia efficit difficiliorem curationem, quando cor, cerebrum, epas, ventriculus, pulmo, affecta fuerint.

20. Malignitas morbi Gallici cognoscitur, si fuerit ex hæreditate contractus, si diutius lateat in corpore, & multis post

annis se prodat: cuius quoque naturæ est, venenum rabidi canis, si suctione lactis contractus sit, & multis annis perduret.

21. Cum febris morbus Gallicus difficulter curatur, & eò magis, quanto maior fuerit febris: quia curantia morbum Gallicum sunt calida & sicca, febrim potius augentia non tollentia.

DE CVRATIONE MORBI GALLICI.

Conclusio VII.

Præsidii, partim ratione, partim experientia inuentis, sola tamen ratione, exclusa prorsus experientia administrandis, morbus Gallicus curandus est.

COROLLARIA.

1. Tria sunt, ut in omni morbo, ita in Gallico præsidia; διατητικά, θεραπευτικά, φαρμακευτικά.

2. Ex his prima duo, ratione inueniuntur, non experientia in morbo Gallico; quia hæc vires corporis, quæ manifestas causas habent, maxime respiciunt; ideo ratione inuentis reparantur alimentis & chirurgicis administrationibus. tertium autem ratione & experientia inueniri debet: ratione, quò ad administrationem in quantitate, tempore, loco, modo: experientia, quò ad occultum iecoris vicium, quod debet occultis medicamentis, quæ per experientiam cognoscuntur, expugnari.

Victus ratio in Gallico.

3. Dieta in morbo Gallico, non vniformis esse debet, quam
Empi-

Empirici, perpetuò in hoc curando seruant, sed pro natura ægri diuersa, quæ hoc modo ratione inueniuntur.

4. Si natura ægri fuerit sicca, humor redundans siccus, victus humidus conuenit: si natura ægri fuerit humida, humor redundans fluidus, victus siccus competit.

5. In agentibus qualitatibus, alimentum non semper debet esse temperatum; sed cum infectio fuerit in bile refrigerante, alimento utendum est, eum in pituita aut melancholia calefaciente.

6. Quare alimenta possunt alterari in corpore frigido calidis, ut pipere, galanga, bonigine &c: in calido frigidis, ut lactuca, cichorea, endiuia, ptisanna. &c.

7. Quantitas cibi pro virium constantia, vel imbecillitate & natura ægri, præscribenda est. In robustis utendum est victu tenui, magis tamen de cibo in augmento minuentes; in imbecillibus crassiore victu, in statu tamen diminutiore: quia cum in statu, natura cum morbo pugnet, alimentis plenioribus corroborabitur infirmior; validior tenui victu non obruetur.

8. Cibus consueto tempore præbendus est, nisi febris peruertat consuetudinem; tum enim quatuor horis ante inuasionem cibandus erit æger, vel post inuasionem, si æger perdurare poterit.

Chyrurgica præsidia.

9. Chyrurgicum præsidium præcipuum est sanguinis missio, quæ à morbi magnitudine, & à virium constantia indicatur: Galenus de curan: ratione per san: missionem, cap. 9.

10. In morbo Gallico, modo vires adsint, quod cum primis metho-

methodus Galeni obseruandum præscribit, missio sanguinis conueniet, siue sit plethora, siue cacochimia. In plethora quidem, vt minuamus plenitudinem: in cacochimia ob viciosum sanguinem, tum vt fientem morbum prohibeamus.

11. Non assentimur iis, qui à sola plethora indicari sanguinis missionem mordicus tuentur, cum in cacochimia, modò vires ferunt, possit administrari: quod Galenus quandoq. se vsum esse felici cum successu sectione venæ in lib: con: Erasistratum cap. 5 in hydropo & spasma gloriatur.

12. Etenim natura conseruatrice est sui: itaq. sanguinem bonum cohibet quantum potest, permittit autem exire viciosum primò, deinde bonum si non poterit retinere: quia sanguis bonus familiaris est & cognatus; viciosus peregrinus. Permittit exire per secretricem vim, cohibet per retentricem. Ad extremum, cum à facultate naturali segregatio & excretio fiat, per instrumenta qui spiritus sunt, expellit probus sanguis viciosum tanquam malleus cuneum, aut ventus vellum.

13. Hoc videre est in aliis excretionibus, vt per secessum dum excrementa, & ad mouendum ineptiora, deiciuntur: succus verò, elaboratus, tenuis, liquidus, lubricus retinetur. In vomitibus hausto iusculo multa eiiciuntur, iusculi nihil. Quare non tantum in plethora sanguinem mittere licebit, sed etiam in cacochimia, modò vires adsint: pueris tamen sanguinem mittere non licebit.

14. Adiuvabunt sectionem venæ consueta vacuamina retenta, vt hæmorrhoides, menstrua purgatio, è naribus consueta sanguinis fluxio: In quibus mittendus est sanguis per chyruddines: in hæmorrhoidibus, per prouocationem menstruorum:

in retentione, per cephalicam venam: in fluxione, è naribus; quia natura liberabitur grauedine, tanquam sarcina, è copia sanguinis retenti contracta.

15. Fonticuli quoque, & cauteria rectè, & suis locis administrata, in Gallico morbo proderunt; vt in pedum doloribus, arteticis, et coxendicis in brachijs; quia intercipietur materia fluens ad pedes & ad coxendices. Hoc autem remedium, iis maximè competet, qui aliquas reliquias morbi Gallici post rectè administrata præsidia habuerint. Nam

Interdum docta plus valet arte malum.

16. Sic in vehementibus capitis doloribus, qui virtutem ægri quandoque prosternere solent, fricationes & ligaturæ fortes adhibitæ, suum habebunt locum; vt auertatur & dissipetur materia negotium facessens.

Præsidia Φαρμακευτικά.

17. Medicamenta pro curando morbo Gallico experientia inuenta sunt: lignum Guaiacū, Salsa parilia, China, Sasafms, pruni sylvestris radix, lignum buxi, cortices ligni Guaiaci: quæ epar occulta quadam facultate corrigunt viciatum; ita vt non amplius succi mali symptomata graui adferentes generentur: dum horum vsu à centro ad circumferentiam per sudores educuntur humores venenata qualitate affecti.

18. Dixi occulta facultate: quia pleraque medicamenta sunt sudorifica, tenuium partium, calida & sicca: non tamen concessum est his curare morbum Gallicum: ita vt specialis facultas illis videatur esse à natura tributa, oppugnandi & eradicandi morbi huius, quam ratione assequi non datur.

E

19. Li-

19. Licet autem hæc medicamenta experientia inuenta sint; nihilominus methodo administrari debent, nempe habita ratione temperamenti, virium, ætatis, magnitudinis morbi, partium affectarum, regionis, temporis anni, &c.

20. His autem medicamentis, ab initio statim non est utendum, nisi prius humores viciosi in ægri corpore ad expulsi-
nem facile parentur, & purgantibus pro rudiori parte euacu-
entur; tum viæ propriis medicamentis efficiantur patentiores.

21. Cum itaq; præparatio curationis ferè sit initium: Præ-
paratio duplex erit, corporis vna, humoris altera.

22. Corporis præparatio est, dum corporis exasperatæ viæ
leniuntur, clausæ aperiuntur, nimium patentes coangustan-
tur, lenes exasperantur.

23. Humorum verò præparatio est, quando feruidi & a-
cres attemperantur, crassi attenuantur, fluidi incrassantur, du-
ri molliuntur, lenti & viscidum detergentur.

24. Præparantia ergo medicamenta in morbo Gallico, 1.
Debent esse iecoraria: quia in hoc affectu iecur læsum est. 2.
Debent esse pro natura humoris peccantis in corpore superflui
& infecti. Nam quamvis tota sanguinis massa inficiatur, ob
epatis vicium; tamen superfluum maximè humor corrumpitur, &
urget ægrum. 3. Debent esse attenuantia in materia crassitie pec-
cante: coquentia in materia ad motum difficili: aperientia, &
neruosas partes respicientia, ut vis medicamenti possit ad di-
stantes partes perducere, & virulentia in profundo corporis habi-
tu consistens, extirpari.

25. Itaq; hi longè à methodo curandi recesserunt, & cum
magno ægroti dispendio curant, qui in singulis Gallico malo
affectis

affectu humorem melancholicum præparant. Fateor quidem ut plurimum exustos humores in hoc morbo reperiri; id tamen non fit perpetuum: præsertim si pituitosi, sanguinei hoc malo prebendantur, in quibus humor ob frigiditatem & humiditatem tantam exustionem non patitur.

26. Ubi igitur fuerit humor frigidus, utendum est betonica, salvia, puleio, marrubio, chamedri, chamepiti, scolopendria, fumaria, cuscuta, epatica, eupatorio, absintio, maci, gingibere, nuce moschata, gariophilis, trium generum piperibus.

27. In calido humore, ut in bile flava, pituita salsa, Usurpanda sunt frigida, quæ maximè epar respiciunt, ut sunt cicorea, lactuca, endiuia, portulaca, plantago, gramen, lens palustris, bordeum, malua, atriplex, sandali omnes, semina frigida omnia, &c.

28. Singulis tribus vel quatuor diebus præparantibus sumptis, purgans sequi debet medicamentum, ut paulatim idonea educatur materia.

29. Sunt qui præparantibus & purgantibus simul non infelici successu utantur medicamentis, quod facere non ausi sunt Hippocrates & Galenus: naturam imitati, quæ prius concoquit, secernit utilia ab inutilibus, postremò expellit.

30. Hoc certè non est absurdum facere in corporibus robustis, quia tolerant facile: & ubi est magna copia prauorum humorum, qui non possunt vnica atq; altera purgatione educi. At in imbecillibus corporibus & humoribus crassis, auulsuq; difficilibus, hoc omninò cauendum est: ne violentia, & non naturæ cōsilio succis prauis excretis, ex morbo leui & minimè molesto, difficilem & periculosum faciamus. Siquidem curatio omnis debet esse, tuta, iucunda, & breuis.

31. Quòd si præparantia & purgantia simul præscribentur medicamento radicibus materiam ducente non nisi post octauum, vel decimum diem vti licebit.

32. Præparantibus autem medicamentis tam diu vti necesse est, donec coctio humorum appareat in vrina: & tantisper euacuantia per vices exhibenda, quòd ad totius corporis expurgatio fiat materiæ iam corruptæ, vt omninò foras eiiciatur.

33. Vniuersi autem corporis purgatione peracta, conuertendum est studium, ad id, quod corrumpitur, quod fit. Hoc verò totum dependet ab epatis vicio in tota substantia consistente: quod expugnatur contrarietate medicamentorum à proprietate operantium: quæ cùm suprà enumerata sint, eorum naturam cognoscenda est in manifestis facultatibus.

34. Lignum igitur guaiacum calidum & siccum est: circa secundum gradum: in secundis qualitatibus attenuat, liquefacit, sudores prouocat. Huc adde, quòd parte resinosa, quam possidet, contagioni atq; putredini resistit. Ex proprietate autem substantiæ mirificam vim & occultam habet ad extirpandum morbum Gallicum.

35. Cortices Guaiaci paullo minorem habent facultatem, nisi quòd vehementius exsiccent, cùm Gal: 6. de sim: dicat: Cortices omnium arborum magis, quàm ligna exsiccare,

36. Salsa parilia calefacit in primo gradu, exsiccat in secundo, attenuat tamẽ magis propter substantiæ suæ tenuitatẽ, & ob id valenter sudorem prouocat. Habet quoq; vim peculiarem, non solum ad curandum morbum Gallicum, sed etiam ad lichneas, cutis efflorescentias, vlcera contumacia, & contra frigidos capitis & cerebri affectus.

37. Ra-

37. Radix Chinæ temperata est, paullo tamen plus exsiccat: valet contra morbum Gallicū in extenuatis corporibus, ad plethorā, asthma, hydropem, sputum sanguinis prolapsis. Contumacibus quoque morbis utilis est, ut epilepsie, paralysi, &c.

38. Adest quoque Sasafras, lignum contra morbum Gallicum vehementissimi auxilij, non ita pridem inuentum, & facultatibus manifestis hæc omnia superans.

39. Lignum exhibetur, aut in substantia, aut in decocto. Decoctum magis probatur: quia in forma pillularum, vel electuarij, exhibitum lignum obstructions parit; præsertim in corporibus densis, & venarum strictarum: quia hoc lignum cum sit resinosum, generat succos, lentos, crassos, qui facile obstruunt.

40. Decoctum autem vel simplex, vel cum alijs permixtum paratur. Simplex, ubi non habetur alicuius partis insigniter læsæ respectus. Contra in permixto.

41. Si fuerit insignis læsio in epate, permiscentur epatica, ut endiua, cichorea, sonchus, gramen, platago, oxalis, eupatoriū, lupulus, absinthium, prassium, paucedanum, chamædris, chamæpitis. In frigida læsione, calidis; in calida, frigidis utendū.

42. Si caput insigniter læsum fuerit, permiscenda sunt capitalia, ut rosa, viola, betonica, flores stechadis, lymphæa, camphora, hiosciamus, salvia, pæonia, sampsuchus, serpillum, centaureum, &c.

43. Si ventriculus insigniter affectus fuerit, permiscenda menta, betonica, absinthium, salvia, sisymbrium, quæ & menta aquatica dicitur, quod de alijs partibus corporis insigniter affectis intellige.

44. Alias permiscetur lignum cum alijs, ut sasafras, corticibus

ticibus suis, vt vis eius augeatur. Pro singulis vncijs ligni datur aquæ communis lb i. alijs plus, alijs minus, prout natura morbi exigit.

45. Aliàs decoquitur lignum non in simplici, sed in stillati-
cijs aquis, vt cichoreæ, endiuie, betonica, bordei, prout exi-
git magis afflictæ partis indicatio.

46. Aliàs in vino cum aqua decoqui debet, cum ventriculi
ratio habetur. Maceratur lignum, & china 24. horis; quia
densum, durum, & pingue: salsa parilia 12. quia tenuium par-
tium, & citò humescit. Decoquitur ad medium, vel tertiam
partem, prout maior facultas requiritur.

47. Talis decoctio dari solet mane ad 3 viij. ante cœnam
ad 3 vi. & post sumptum syrupum sudor est excitandus, vt ma-
teria venefica euacuetur à centro ad circūferentiam sudoribus.

48. Pro potu decoctio sit ex remanentijs superioris decocti,
addita aliqua portione recentis ligni, si requirimus maiorem fa-
cultatem in potu, dupla vel quarta pars aquæ in secundo deco-
cto addi debet.

49. Sunt, qui ligni decocto admiscant medicamenta soluen-
tia; vt senam, polipodium, epitimum, elleborum, agaricum;
quod ita probo, vt sudores in tali decocto non excitentur: quia
purgantia trahunt humores à circūferentia ad centrum. Quod
si sudor excitaretur, contrarij motus eodem tempore fierent, quod
esset cum detrimento ægroti.

50. Decoctum propinari debet cum sudoribus excitandis, ad-
minus ad decimum quartum diem, ad summum ad sexagesimum
diem; prout vel malum hoc extirpari; vel patiens tolerare po-
terit.

51. Quod si fuerit morbus in habitu, nec dolores & tumores decoctis his leniuntur aut cessant, vltimum remedium erit vntio ex Mercurio, quod argentum viuum dicitur. Hoc habet eam vim alijs medicamentis adiutum, vt ex toto corpore materiam euacuet, suaq; vi ab habitu corporis repellat ad loca euacuationi accommodata.

52. Unguentum ex Mercurio, variè componi solet, pro vario affectu, natura, temperie ægrotantis: hæc tamen compositio non inepta erit. ℞ Mercurij ℥ iij s. extincti in pinguedine porcina sine sale; olei laurini, vulpini añ. ℥ ij. cineris vitis ℥ i s. Theriacæ magnæ ℥ s mastice & thuris añ ℥ iij cerusæ ℥ i s misce, & fiat linimentum.

53. Quæ compositio tota fundatur in Mercurio tanquam basi: pinguedo porcina facit, ne vltro citroque argentum moueatur: thus, mastix, thiriaca magna, temperat Mercurium: cinis facit illum penetrare, & exsiccare vlceri: olea discutunt, cerussa ob corpulentiam additur.

54. Hoc vnguento inungenda est pars tumefacta, & articuli, vt discutiat crassitiem humoris in parte tumida, & interius compellat ad loca conferentia. Nullum autem vnguentum hoc præstat ad commodius discutiendam crassam materiam, & in corpore quasi adnatam.

55. Sunt qui ex Mercurio in aqua forti cocto donec tota humiditas absumatur, conficiant puluerem: cuius grana quinque cum electuario vel syrupo admiscentes, conficiunt pilulam, quâ vulgus chirurgorum desperatam vocant: sed cum hoc sit valentissimum, & minus tutum medicamentum, ab hoc potius abstinendum putem.

56. *A suffimentis quoque ex cannabrio in hoc curando morbo abstinendum existimo; quia vapor hic infestissimus thoraci & nervis sit.*

BREVIS QVORVNDAM SYMPTOMATUM morbi Gallici curatio.

Pustularum.

1. *Pustulæ apparentes in cute, oriuntur ex humore prava qualitate infecto; ideo humor is auferendus est: deinde pustulæ exsiccandæ.*
2. *Aufertur humor sanguinis missione, in plethora, ut minuamus multitudinem; in cacochimia, ut minuamus vitium sanguinis. Sanguinis autem missio stante virtute, partitis vicibus, etiam sexies instituenda erit.*
3. *Deinde purgandus humor peccans, quo purgato ad decoctum ex salsa, vel Guaiaco deveniendum est, ut per sudores totum corpus euacuetur.*
4. *Postremo pustulæ exsiccantur aqua forti attemperata; aut aqua plantaginis cum alumine cocta.*

Ulceris curatio.

1. *Si vlcus in pudendo appareat, primò eius caliditas, quam erosio attestatur, auferenda est lotione frigida; ut aqua rosea, nemupharis, &c.*

2. *Dein de*

2. Deinde *vlcus* detergendum, vt *sordes auferantur*: quia *impediunt vlceris coalitum*. Auferentur modico *Vigonis puluere* cum *unguento albo*, quod temperabit *mordicationem pulueris*.

3. In *ulcere calloso*, solo *pulvere* vtendum est, vt *callus consumatur*, & *extersio fiat*.

4. *Exterso* & *mundificato vlcere*, *cicatrix inducenda aluminis parte vna*, *tartari media*, & *tertia parte*, cum *vino* & *aqua rosacea commistis*.

5. In *contumaci vlcere*, *unguento ex Mercurio* fac *inungi* *puendum*: quod *exsiccat*, *corriget membri temperamentum*, & *extinguet morbi seminarium*.

Verrucarum in membro curatio.

1. *Verruca cum sit excrescientia carnis*, *auferenda est non ferro*, quia *dolorem excitans accersit grauius Symptomata*, sed *deligatione*.

2. *Filo serico* fac *verrucam deligare*, ac *sensim ac sensim adstringere*, & *iterum aliquo temporis spatio interiecto fortius adstringenda*, quoad *decidat*.

3. *Ablata verruca*, *relinquitur eius radix*, ex qua *iterum enasci solet alia*: proinde *haec auferenda est exsiccantibus & calidis*, quo *funditus eradicetur*; vt sunt *oleum sulphuris*, *calchanti*, &c. *partibus tamen sanis pecia ex diapalmate munitis*, ne *corrodantur*.

4. *Quod si patiens deligationem nolit sustinere*, in *pecia*, *oblita diapalmate*, *foramen ad magnitudinem verrucæ effici-*

F

endum

endum est, per quod verruca emineat: Et tum causticum in oleo amygdalino dissolutum adhibendum est, ut & verruca, & ipsius radix tollatur.

5. Ad abstergendum vulcus, vel vnguentum ex Tapsia, vel lotio ex adstringentibus vsurpanda est. In contumacibus reliquis verrucæ lotio adhibenda est, facta ex decoctione ligni sancti, vel corticum eius, in fine ebullitionis addentes vinum adstringens. Serum quoque chalibeatum, magnum extrinsecus potest aderre adiuamentum.

6. Hæc autem fiant cum totius corporis purgatio præcesserit, alioquin fluxione malum fouebitur.

Gonorrhææ curatio.

1. Accidit per pudendum substantiam albam fluere, quæ non est genitura; sed pus: quia cum dolore exit: genitum autem sine dolore. Et hic affectus Gonorrhæa improprie vocatur.

2. Pus autem illud fit ex multis vlcusculis in parte interna penis ortis, quod cum acre sit, mordax, per partes exquisiti sensus fluens dolorem facit.

3. In hoc affectu primo mittendus est sanguis, partim ne ob dolorem attracto humore fiat inflammatio: partim ut vicium peccantis materiæ minuatur.

4. Humor peccans purgandus est medicamentis proprijs, ut causa fluxionis auferatur.

5. Detergendum est vlcus symphone liquido medicamento intus iniecto, deinde cicatrix inducenda.

6. Si fuerit magnus dolor, occurrendum est dolori auferen-

do caussam, quæ est acrimonia urinae, mordicans partes exulceratas: hæc temperanda erit syrupo violaceo, cum decoctione maluarum & liquiritiæ, &c.

7. Solet ex his vlcusculis enasci intus verruca, vel carnis tuberculum, si diutius durauerint, hæc tollenda erit candela cerea subtili, cuius summitas unguento consumendi vim habente illinatur, intus indita vsque ad tuberculum, quoad illinatur illo unguento, Vide Amatum Lusitanum.

Bubonis curatio.

1. Bubo est tumor præter naturam in aliquo inguinis latere ortus vel ex materia pituitosa, frigida, crassa, qui fit sine dolore: vel ex materia calida, acri, mordaci, qui fit cum summo dolore.

2. Bubo, aliunde ad glandulas, siue adenes fluente materia, generatur: proinde & id quod fluit sistendum, ne amplius coaceruetur materia in loco: & id quod affluxit; quia est præter naturam, euacuandum.

3. Sistitur materia fluens reuulsione, per sanguinis missionem, secta basilica eiusdem lateris, quæ cum loco affecto rectitudinem seruat.

4. Materia quæ in tumorem coaceruata est euacuatur, partim sectione venæ pedis eiusdem loco affecto respondentis: partim per insensibilem transpirationem, applicatis digerentibus medicamentis: ut diachylone, insperso puluere iridis.

5. Quod si materia ob crassiciem per halitum digeri non possit, sed ad suppurationem propendeat, suppurantia medicamenta applicanda sunt.

6. Pure iam apparente eius euacuatio tentanda est, apertione tumoris.

7. Aperitur tumor caustico, & sectione. A caustico cauendum est: quia dolorem excitat, qui rursus accersit nouam materiam fluxionem. Sed aperiendus abscessus sectione, facta scilicet alipello in decliui tumoris loco, ut via puri pateat. Gal. 13. Met. med. cap. 5.

8. Deinde fiat vlceris deterfio: postea carnis deperditæ regenerationio: vltimò cicatrix inducenda est.

9. Quod si his malum non cedat, ad decoctum Ligni veniendum erit.

Dolorum curatio.

1. Dolores, sine vlllo tumore, solent ægros infestare, vel in vna, vel in multis partibus consistentes. Hi curantur primò missione sanguinis, ut impediamus fluxionem sanguinis ad partem dolentem.

2. Deinde purgatione humoris peccantis, præmissa tamen prius humorum ad motum ineptorum præparatione.

3. Quod si his non cedant dolores, ad decoctum Ligni, vel Salsæ confugiendum est; et ab hoc ad inunctionem vnguento ex Mercurio partis dolentis: aut si in multis partibus dolor, vniuersalis inunctio præcipienda erit.

Cariei curatio.

1. Accidit aliquando, ut materia non solum carnosas partes,

tes, sed etiam ossa erodat, qui affectus Caries dicitur.

2. Curatio huius in totius corpore expurgatione diligenti consistit, & in operationibus chyrgicis.

3. Os corruptū, quia est præternaturam, auferendum est, ne sana pars vicium contrahat, sed ad consolidationem paratior sit.

4. Signa corrupti ossis erunt: primò, cum squamæ ab osse ultro decident: secundo, quando livido colore, vel simili pustularum ossa affecta fuerint: tertio, quando medicamenta generosa non curant pustulas, & unitatis solutionem in cariosa parte, coniectura sit vitium in osse ali.

5. Aufertur corruptum os abrasione, parte affecta primum scabra terebello reddita, deinde leuiter scalpello abrasa.

6. Aufertur quoque ferramento candenti, munitis tamen sanis partibus, vel instrumento ferreo, vel pecis lineis in aqua madefactis. Adustio vsque ad medullam fieri potest, exceptis ossibus capitis, & spinæ, in quibus noxia est tanta adustio.

7. Amoto osse corrupto, intentio est, ut partis temperamentum conseruetur corroborantibus, & in loco ossis abradi callus genitus vicem suppleat.

8. Postremò carnis & cicatricis generationi incumbendum est.

9. Quanquam hæc operatio non debet adhiberi, nisi cum iam æger decocto Ligni, vel Salsæ, pluribus diebus vsus fuerit.

Gummatum curatio

I. Gummata materiam habent crassam, viscosam, & induritam, quæ incidenda & emollienda primum erit extrinse-

F ij

cis

cis medicamentis : deinde per insensibilem halitum euocanda digerentibus.

2. *In his tamen præcedere debet sanguinis missio, humoris redundantis in toto corpore purgatio.*

3. *Sed quia hæc materia ob crassiciem, & duriciem, contumax solet fieri, usus decocti in tali morbo consueti, maxime probandus est, isq; diuturnus.*

4. *Quod si materia induruerit vetustate, nec insigne actionis impedimentum faciat, ut congenea sinenda est potius, quam irritanda, ne dum hanc in parte aliqua nitimur tollere, toti corpori noxam adferamus.*

Fluxus alui.

1. *Fluxus alui, si non sit validus, sufficiet intestina corroborare, ne offendantur, ut lacte calibeato, cum vitellis ouorum & pinguedine castrati per clysterem injecto. Et hoc si fuerit criticus.*

2. *Quod si sanguinis fluxus fuerit symptomaticus, statim sistendus est; quia sanguis est thesaurus vitæ.*

3. *Sistitur per adstringentia, ut si lacti calibeato, addantur pulveres boli armeni, sanguinis draconis, &c. per clysterem injicienda.*

4. *Humor tamen acris, erosionem faciens, purgandus primo est medicamentis parum torrefactis; ut intestina roborentur, ne fluxionem recipiant: nam frustra adstringere propembris, nisi causam fluxionis, humorem acrem, aufertis.*

5. *Distinguendus tamen locus affectus: si enim vlcus fuerit*
in in-

in intestinis tenuibus, per os medicamenta exhibenda: si in crassis per clysterem; quia per os integris viribus non peruenirent ad crassa.

6. *Extergendum vlcus in tenuibus, syrupum præbentes de agresta, ros. seccarum, myrtillorum, &c. In crassiss, decocto hordei cum cortice, melle rosaceo facto clystere: si adest dolor, oleum adde rosaceum.*

7. *Expurgato vlcere, quod cognoscet ex paucitate saniei, & ex sanguine puro egrediente, cicatricem inducentibus vtendum.*

HÆc sunt quæ de morbo Gallico in tanta authorum varietate, publicè asserere libuit; non tamen sine subiectis quantum breuitas permittebat rationibus, non validis illis quidem fateor; sed tamen ad veritatem illustrandam, non ineptis. Quod si aliquis abundat, vel ad hæc roboranda, robustioribus; vel ad euertenda, contrarijs, ea que docendi non contenti studio proferat: conscij tenuitatis nostræ parati erimus meliora sequi.

Sub felicibus auspicijs Reuerē. viri,
Domini NICOLAI DOBROCIESKI, Philo-
sophiæ & Iuris vtriusq; Doctoris, Rectoris ge-
neralis Vniuersitatis Cracouiensis.

12



in
for
ad

for
for

for
for

for
for

for
for

for
for

for
for

for
for

for
for

for
for

